



Arkivnr: 2015/11453-136
Saksbehandlar: Adeline Berntsen Landro

Saksframlegg

Saksgang

Utval	Saknr.	Møtedato
Fylkestinget		02.10.2018

Revidering av vedtekter for Fagskolen i Hordaland og fastsetting av kompensasjon

Samandrag

Med bakgrunn i ny fagskulelov av 01.06.2018 er det naudsynt å endre vedtektene til styret for Fagskolen i Hordaland (fagskulestyret). Den nye lova, som heiter «lov om høyere yrkesfaglig utdanning» (fagskulelova), er vesentleg endra i struktur og innhald i høve til tidlegare «lov om fagskuleutdanning». Krav til samansetning av styret er også endra i lova, og på bakgrunn av dette vil fylkesrådmannen tilrå at samansetninga av det nye styret vert som følgjer:

- 1) Tre representantar frå det regionale folkevalde nivået, der éin representant vert valt frå utval for opplæring og helse (OPHE), og éin representant frå utval for kultur, idrett og regional utvikling (KIRU), og med to varamedlemar.
- 2) To representantar frå relevant arbeids- og næringsliv med eitt varamedlem.
- 3) Éin representant frå dei tilsette ved Fagskolen i Hordaland med éin personleg vara.
- 4) Éin representant frå studentane ved Fagskolen i Hordaland med éin personleg vara.

Punkt 2-4 tilfredsstillar direkte krav til representasjon i fagskulelova. Punkt 1 er ei endring frå tidlegare då det var valt 5 eigarrepresentantar frå det regionale folkevalde nivået utan at det var spesifisert kva utval representantane skulle kome frå. Ved å velje éin representant frå OPHE og éin representant frå KIRU får styret kompetanse både frå det skulefaglege utvalet og frå utvalet i høve til regional utvikling. Fagskolen i Sogn og Fjordane har også slik representasjon i sitt fagskulestyre. Vidare vil fylkesrådmannen tilrå at styret ikkje skal ha meir enn sju medlemar slik som i dag, og det vert derfor to færre representantar frå det regionale folkevalde nivået.

I høve til kompensasjon har styret hatt tradisjon for å følgje «Reglement om godtgjersle for folkevalde i Hordaland fylkeskommune», og fylkesrådmannen vil tilrå at dette vert vidareført.

Økonomi: Ingen kjent effekt.

Klima: Ingen kjent effekt.

Folkehelse: Ingen kjent effekt.

Regional planstrategi: Regional plan for kompetanse og arbeidskraft vektlegg arbeidslivet sitt behov i høve til dimensjonering av fagskuletilbodet i regionen. Ved å velje to arbeids- og næringslivsrepresentantar til styret for Fagskolen i Hordaland vil ein kunne bidra til å styrke styret sin kompetanse om regionalt arbeids- og næringsliv i Hordaland.

Forslag til vedtak

1. Reviderte styrevedtekter for styret for Fagskolen i Hordaland vert vedteke slik det går fram av saka og erstattar vedtekter av 23.02.2017.
2. Reglement om godtgjersle for folkevalde i Hordaland fylkeskommune gjeld også for styret for Fagskolen i Hordaland sine medlemar i høve til møtegodtgjersle (punkt 4.2), tapt arbeidsforteneste og utgifter (kap 5.), og oppgjersrutinar (kap. 10).

Ingrid Kristine Holm Svendsen
kst. fylkesrådmann

Svein Leidulf Heggheim
fylkesdirektør opplæring

Saksframlegget er godkjent elektronisk og har derfor inga underskrift.

Vedlegg

- 1 Styrevedtekter av 230217

Fylkesrådmannen, 29.06.2018

Med bakgrunn i ny fagskulelov av 01.06.2018 er det naudsynt å endre vedtektene til styret for Fagskolen i Hordaland (fagskulestyret). Den nye lova, som heiter «lov om høyere yrkesfaglig utdanning» (fagskulelova), er vesentleg endra i struktur og innhald i høve til tidlegare «lov om fagskuleutdanning». Til dømes vert fagskulestyret sitt ansvar for fagskuleutdanning omtala i meir detalj enn før, og krav til samansetninga av styret er endra. Forslag til reviderte styrevedtekter er endra i høve til ny struktur i lova og gjev fleire detaljer om styret sitt ansvar. Den største endringa er likevel styresamansetninga, og i fortsettinga vil dette verte gjort greie for.

Samansetning av fagskulestyret

Styret for Fagskolen i Hordaland har fram til no hatt følgjande samansetning jf. vedtektene, punkt 2, av 23.02.2017 (sjå vedlegg):

Styret for Fagskolane i Hordaland har sju medlemar. Fem medlemar, med to varamedlemar, blir valde av fylkestinget. Tilsette og studentar har éin representant kvar med personleg vara. Tilsett- og studentrepresentant har møte-, tale-, forslags- og stemmerett, og er fullverdige medlemar av styret.

Fylkestinget nemner opp eigarrepresentantane i styret og mellom dei leiar og nestleiar. Tilsette og studentrepresentant med personleg varamedlem blir vald av og mellom dei tilsette og studentane. Eigarrepresentantane blir valde for fire år, tilsettere representantane blir valde for to år og studentrepresentantane for eitt år om gongen.

Den nye fagskulelova § 10 seier følgjande om styret si samansetning:

«§ 10. Styrets sammensetning

Styret skal ha minst sju medlemmer. Minst to medlemmer skal ha bakgrunn fra relevant arbeids- eller næringsliv. Minst ett medlem skal være valgt av og blant de ansatte, og minst ett medlem skal være valgt av og blant studentene. Hvis styret har mer enn ti medlemmer, skal minst to medlemmer være valgt av og blant studentene og minst to av og blant de ansatte. Det skal velges personlig varamedlem for medlemmene valgt av de ansatte og studentene. Det skal være minst ett varamedlem for medlemmene fra arbeids- eller næringsliv, og minst ett varamedlem for de øvrige medlemmene. Eier utpeker selv, eller fastsetter hvem som skal utpeke, styrets leder.

Ved valg av styremedlemmer gjelder likestillings- og diskrimineringsloven § 28 innen den enkelte valgkrets.

Styremedlemmene og varamedlemmene velges for inntil fire år. Styremedlemmer og varamedlemmer som velges av og blant studentene, velges for ett år. Styremedlemmer og varamedlemmer kan gjenvelges.»

Før ny fagskulelov trådte i kraft, var det mellom anna ikkje krav til representantar med bakgrunn frå relevant arbeids- og næringsliv. I handsaminga av ny fagskulelov (Prop. 47 L 2017-2018¹) peikte Kunnskapsdepartementet på at ulike høyringsinstansar hadde ulik oppfatning av kva dette skulle bety. Til dømes meinte Nasjonalt fagskoleråd at desse representantane både bør kunne rekrutterast direkte frå arbeidslivet og frå partane i arbeidslivet og andre yrkesfaglege organisasjonar, regionalt eller nasjonalt. LO meinte at representantane burde rekrutterast fortrinnsvis frå partane i arbeidslivet med regional tilknytning, medan NHO meinte at det ikkje burde vere eit krav eller ei føring på at arbeidslivets representantar må ha regional tilknytning. Spekter meinte mellom anna at representasjonen i styret må vere meir direkte ved at

¹ Drøftinga om styret si samansetning i Prop. 47 L 2017-2018 kan lesast i sin heilheit i kap 12.

<https://www.regjeringen.no/contentassets/34b3084dfd5c4c6295d0198689a81fc1/no/pdfs/prp201720180047000dddpdfs.pdf>

arbeidslivet er mykje tettare på kven som skal sitje i styret, og at dei faktisk har sitt virke i det relevante arbeidslivet. Til slutt meinte departementet at arbeids- og næringslivsrepresentantane fortrinnsvis burde ha regional tilknytning, men at dette ikkje var naudsynt å spesifisere i loveteksten. Likevel burde ein forsøke å oppnå ei slik tilknytning der det er høveleg, og at det inngår i totalvurderinga av representantane si erfaring og tilknytning.

Fylkesrådmannen vil tilrå at det ved val av arbeids- og næringslivsrepresentantane vert lagt vekt på både regional tilknytning og arbeidsbakgrunn i høve til kva retning ein ønskjer for Fagskolen i Hordaland. Dette gjeld til dømes om det er spesielle fagområde som er viktige dei neste fire åra. Fagskolen i Hordaland har stor fagleg breidde, og det kan derfor vere føremålstenleg å gjere strategiske val ut frå fagskulen sine faglege satsingsområde.

Vidare vil fylkesrådmannen tilrå at det nye styret ikkje har meir enn sju medlemar, som i dag, og det vert derfor to færre representantar frå det regionale folkevalde nivået. Det er fordelar ved at eit styre som gruppe ikkje vert for stort, og innanfor storleiken på sju medlemar finn ein god representasjon frå alle gruppene som skal vere representert jf. fagskulelova.

Med bakgrunn i argumentasjonen over vert følgjande samansetning føreslått:

- 1) Tre representantar frå det regionale folkevalde nivået, der éin representant vert valt frå utval for opplæring og helse (OPHE), og éin representant frå utval for kultur, idrett og regional utvikling (KIRU), og med to varamedlemar.
- 2) To representantar frå relevant arbeids- og næringsliv med ein varamedlem.
- 3) Éin representant frå dei tilsette ved Fagskolen i Hordaland med éin personleg vara.
- 4) Éin representant frå studentane ved Fagskolen i Hordaland med éin personleg vara.

Punkt 2-4 over er i tråd med fagskulelova. Punkt 1 er ei endring frå tidlegare då det var valt 5 eigarrepresentantar frå det regionale folkevalde nivået utan at det var spesifisert kva utval representantane skulle kome frå. Ved å velje éin representant frå OPHE og éin representant frå KIRU får styret kompetanse både frå det skulefaglege utvalet og frå utvalet i høve til regional utvikling. Fagskulen i Sogn og Fjordane har også slik representasjon i sitt fagskulestyre.

Fylkesrådmannen sitt forslag til reviderte styrevedtekter

Styrevedtekter

Styret for Fagskolen i Hordaland

*Vedtatt av fylkestinget DATO
Erstattar vedtekter frå 23.02.2017*

Revidert etter lov om høyere yrkesfaglig utdanning (fagskulelova) nr. 28 - 08.06.2018. gjeldande frå 01.07.2018.

1 STYRET SIN LEGITIMITET, VIRKEOMRÅDE, SAMANSETNING OG OPPNEMNING

§1-1 Lovgrunnlaget – relasjonen mellom skuleeigar og styret

- 1) Fagskolen i Hordaland er underlagt lov av 08.06.2018 om høgare yrkesfagleg utdanning (fagskulelova) samt andre aktuelle lover, forskrifter og reglement som gjeld for offentlege verksemdar.
- 2) Hordaland fylkeskommune ved fylkestinget er den formelle eigar av Fagskolen i Hordaland. Fylkestinget treffer vedtak på vegne av fylkeskommunen om ikkje anna følgjer av lov eller delegasjonsvedtak.
- 3) Fagskulelova §§ 9 og 10 stadfester at fagskular skal ha eit styre som øvste ansvarlege styringsorgan med minst sju medlemar.
- 4) Skuleeigar kan utøve eigarskap på tre måtar
 - a) Val av styremedlemar og eventuelt avsetting av styret
 - b) Finansiering
 - c) Styret sine vedtekter

§ 1-2 Samansetning og oppnemning av styret

- 1) Styret vert oppnemnt av fylkestinget og skal ha sju medlemar. Jf. fagskulelova § 10 første ledd skal to av medlemane ha bakgrunn frå relevant arbeids- eller næringsliv; minst ein medlem skal vere valt av og blant dei tilsette, og minst ein medlem skal vere valt av og blant studentane. Det skal veljast personlege varamedlemar for medlemane som er valt av dei tilsette og studentane. Det skal vere minst ein varamedlem for medlemane frå arbeids- eller næringsliv, og minst ein varamedlem for dei andre medlemane.
- 2) Fylkestinget vel leiar og nestleiar, eigarrepresentantar og arbeids- eller næringslivsrepresentantar. Eigarrepresentantar og arbeids- eller næringslivsrepresentantar vert valt for fire år, og følgjer fylkestingets valperiode. Tilsettrepresentant vert valt for to år, og studentrepresentant vert valt for eitt år. Styremedlemar kan veljast igjen.
- 3) Ved val av styremedlemar gjeld likestillings- og diskrimineringslova § 28 innan den einkilde valkrets.
- 4) Styret for Fagskolen i Hordaland skal ha følgjande samansetning:
 - a) Tre representantar frå det regionale folkevalde nivået, der ein representant vert valt frå utval for opplæring og helse, og ein representant frå utval for kultur, idrett og regional utvikling, og med to varamedlemar.
 - b) To representantar frå relevant arbeids- og næringsliv med ein varamedlem.
 - c) Éin representant frå dei tilsette ved Fagskolen i Hordaland med ein personleg vara.
 - d) Éin representant frå studentane ved Fagskolen i Hordaland med ein personleg vara.

§ 1-3 Vedtaksført styre og gjennomføring av styremøte

- 1) Styret kan fatte vedtak når meir enn halvparten av medlemane eller tilsvarande mange varamedlemar er til stades og avgjev stemme. Vedtak vert fatta med alminneleg fleirtal om ikkje

anna er fastsett i fagskulelova i høve til einskilde saker. Ved likt tal på stemmer avgjer møteleiar med dobbelstemme.

- 2) Styremøta vert leia av styreleiar eller nestleiar i denne sitt fråvær. Om ingen av desse er til stades, vert det valt ein møteleiar av styret i møtet.

2 STYRET SITT ANSVAR, MYNDE OG OPPGÅVER

§ 2-1 Generelt

- 1) Styret skal bidra til å leggje premissane og utforme strategi for utviklinga av fagskuleutdanninga innafor dei mål og rammer som gjeld for Fagskolen i Hordaland. Styret skal sikre at fagskuleutdanningane held høg kvalitet, og at studentane får gode utdanningsvilkår. Fagskolen i Hordaland skal vere ein regional utviklingsaktør med fleksibilitet i tilbodsstruktur og utdanningstilbod.
- 2) Styret er, jf. fagskulelova § 9, a) og b), økonomisk og juridisk ansvarleg for all fagskuleutdanning. Styret er også økonomisk og juridisk ansvarleg for kursverksemd som vert tilbudd av fagskolen.
- 3) Ein fagskule skal ha ein rektor, og styret sjølv skal tilsette rektor. Rektor skal ha naudsynt fag- og leiarkompetanse. Studentane og dei tilsette skal verte høyrd før ein rektor vert tilsett. Om ei avgjerd i ei sak ikkje kan vente til styret kan kome saman i møte kan rektor ta avgjerd i saka. Styret kan også gje rektor fullmakt til å avgjere saker som ikkje bør utsettast til neste styremøte.
- 4) Styret sjølv skal fatte vedtak om det etter styret sitt skjønn er forsvarleg å ta opp nye studentar. Vedtaket skal fattast før studiestart jf. fagskulelova § 9 andre ledd.
- 5) Styret kan delegere avgjersler til andre ved fagskolen dersom det ikkje følgjer av fagskulelova at styret sjølv skal fatte vedtak jf. fagskulelova § 9 fjerde ledd.
- 6) Styret er ansvarleg for at det vert gjeve forskrift om opptak, eksamen, prøver og anna arbeid, samt disiplinære sanksjoner og reglar for klagehandsaming.
- 7) Fagskolen skal opprette ei lokal klagenemnd som skal handsame klager over skulen sine enkeltvedtak. Styret kan bestemme at den lokale klagenemnda også skal handsame klagesaker etter § 23 i fagskulelova og gjere vedtak i saker etter §§ 24 til 27 i fagskulelova. Avgjerd om habilitet etter §§ 6-10 og om teieplikt etter §§ 13-13 e i forvaltningslova gjeld for handsaming av saker. Avgjerd om opptak, fritak, godskriving, avsluttande vurdering, bortvisning, utestenging, annullering av eksamen og andre disiplinære sanksjonar skal handsamast etter reglane om enkeltvedtak i forvaltningslova.

§ 2-2 Styret sitt ansvar for fagskuleutdanninga

- 1) Styret skal:
 - a) Sørge for at studentane får den utdanninga som fagskolen har akkreditering for
 - b) Sørge for at alle vilkår for eventuelle offentlege tilskot er oppfylt
 - c) Sørge for at opplysningar som vert gjeve til NOKUT, studentar og dei som søker utdanning, er korrekte og fullstendige
 - d) Sørge for at det vert gjeve naudsynt informasjon og rettleiing til søkjarar og studentar ved fagskolen, mellom anna om kostnader knytt til utdanninga, studietilbod, søknadsfristar og opptakskrav.
 - e) Bestemme krav til lærarkompetanse, instruktørkompetanse og leiinga ved fagskolen.

- f) Sørgje for at verksemda vert drifta i samsvar med gjeldande lover og reglar, og etablere og sørgje for gjennomføring av systematiske kontrolltiltak (internkontroll) for å sikre dette.
- 2) Styret har det overordna ansvaret for studentane sitt læringsmiljø. Styret skal, i samarbeid med studentorgana, leggje til rette for eit godt og inkluderande læringsmiljø.

3 ANDRE TILHØVE

§ 3-1 Saksførebuing

- 1) Fylkesdirektør opplæring er ansvarleg for saksførebuing til styret.

§ 3-2 Habilitet

- 1) Styret sine medlemar er underlagt føresegner om habilitet jf. forvaltningslova §§ 6 til 10, og om teieplikt §§ 13 til 13 e.

§ 3-3 Tilgang til å avsette styret

- 1) Fylkestinget kan avsette styret om det er sakleg grunn til det (jf. § 1-1 fjerde ledd i vedtektene), og nemne opp eit midlertidig styre inntil nytt styre kan veljast etter reglene i fagskulelova § 10.

§ 3-4 Revisjon – Fastsetting av endringar

- 1) Innafor fylkestinget sin periode vert fylkesutvalet gjeve mynde til å vedta endringar i vedtektene om dette er naudsynt.
- 2) Styrevedtektene er sist revidert og vedteke i fylkestinget DATO (sak PS XX/18).

Fastsetting av kompensasjon

Det har vore lang tradisjon for at medlemane i fagskulestyret har fått møtegodtgjersle og anna kompensasjon i tråd med «Reglement om godtgjersle for folkevalde i Hordaland fylkeskommune», og fylkesrådmannen vil tilrå at denne praktisen vert vidareført. Det er reglar for møtegodtgjersle (punkt 4.2), tapt arbeidsforteneste og dekking av utgifter (kap 5.), og oppgjersrutinar (kap. 10) som er relevante for fagskulestyret.

Reglementet finn ein her:

<https://www.hordaland.no/globalassets/for-hfk/politikk/retningslinjer-pdf/reglement-om-godtgjersle-for-folkevalde-i-hordaland-fylkeskommune.pdf>